



DEO OPTIMO MAX.

UNI ET TRINO,

VIRGINI DEI-PARÆ, ET S. LUCÆ,

Orthodoxorum Medicorum Patrono.

QUÆSTIO MEDICA,

CARDINALITIIS DISPUTATIONIBUS,
manè discutienda in Scholis Medicorum, die Martis vigesimâ-tertiâ
mensis Aprilis, anno Domini M. DCC. LXXI.

M. PETRO ARCELIN, Doctore Medico, Præside.

An infantum vagitus cunarum succussionibus compescere Nexium?

I.



OMO, naturæ decus, quantum in virili ætate ad robur athleticum accedere videtur, tantum in ætatulâ maximæ debilitatis præbet argumenta. Ubi primum in lucem prodiit, omnigenam continuis ferè clamitationibus quærit opem, ut obtineat utilia, nocivæque amoveat: sed materno ut plurimum substractus uberi, novercæ trahitur quæ, lucro non amore allecta, suis tantum commodis inservire

allaborat. Quot exindè incommoda ! Quot morbi pueris accersantur ! etate debiles subsidium in emptitiâ curâ vix reperiunt. Frustrâ vagitibus dolores exprimit, aut vitæ postulat necessaria sui non compos infans ; frustrâ molestum commutare situm corporis nitiur ; irritos, quidquid agat, conatus edit. Angustolinteorum velamine reuinctus compressos nequit artus extendere, & in cunis re-supinus quasi sub prælo detinetur. Hinc prima mali labe : coactò torpescit otio, dum natura motum indicat functionibus ritè peragendis necessarium. Quæ ad œconomiae animalis utilitatem meliùs profecissent, totæ in edendis vagitibus vires impenduntur. Hujusce incommodi consciae nutrices, aut vagitium pertæxæ stridulos compefcere sonos repetitâ cunarum agitatione moliuntur ; tunc enim cerebri præsertim fibrillæ concutiuntur, insolitoque motu quassati humores in vasculis hærent, indè obstupefcit infans, spirituum imminuitur copia ; ocluduntur palpebræ, succeditque somnus merè simultaneus & passivus : cessant interim gemitus ; sed intus crudeliter sæviunt, occultè quamvis, sopitæ malorum causæ.

I I.

PERDIFFICILIS nutricum delectus : Medicus in hac optione princeps methodum, præcepta, conditionem tradit : ex iis exquisitè discendum, quæ sit natura infantis, quis habendus exindè finis, ne quid ejus sanitati, nutricum imperitiâ, contingat ? Maxima corporis humiditas, mollis ac delicatissima fibrarum textura, ea est infantum prima constitutio : humiditatem consumere, fibris robur conciliare, mala præsentia dignoscere ac depellere, hic est scopus ad quem nutrix non minùs sagax quàm provida collimet necesse est. Nùm infanti somnum facitium cunarum nimiam agitatione excitando à triplici hoc fine declinent considerare opus est ? Ex moderato naturalique somno eximiæ manant utilitates, scilicet exhaustis spiritibus novam eorum fabricam elaborare, progressivo ab intimis visceribus ad corporis peripheriam calore, costum optimè transpirationis humorem foras eliminare, sicque vires sanguini, fibris elaterium addere : at verò è somno repetitis cunarum succussibus adventitio ac præternaturali non parva prostant incommoda ; hinc sanguis ferè decomponitur, luxurianti sero inundantur fibræ, minori sanguinem vasa quatiant elatere, torpescit circulatio, intra textum cellularem adiposa nidulatur congeries fistam mentiens sanitatem, innumerisque ansam præbens malis. Nùm hujusce contagii immunes pueros prætituras se arbitrantur istæ sæminæ ? Minimè gentium : quin minùs intempestivo somno totiès accersito malorum iliadem infanti ab ovo cumulant.

I I I.

AB istâ sanè teterrimâ methodo infantuli fibræ molles, jam laxæ & madiores adhuc emollescunt, laxantur, & serum combibunt ; sed nec minus detrimētum delicatulis infantibus cunas concutiendo quotidie infertur. Incalissime

igitur de pueri maximâ sensuum debilitate nos docuit sapiens natura , quæ primis à nativitate diebus corneam membranalâ obducere curavit , ne oculum radii solis , si eum immediatè afficerent , insolito idcòque vividiori lumine percellerent : quæ auris tympanum in apertum protulit , ne in imo tortuosi canalis anfractu conditum collectis ac percussis sonis obtunderetur ? Frustrane monuit natura quàm delicatè tractandi sint infantes , si à nutricibus modo tam rudi succutiantur ? Nonne jam satis diris convulsionibus laborant hi miselli , ut nova iis , nova vertigini vomitibusque æruginosis ansa præbeatur ; nausæas etiam & colicos dolores ab istis succussibus quis dubitaverit ? ita se res habet : enim verò lacte vescuntur infantes ; si lac agitetur , acceleratur ejus decompositio , butyrum separatur , remanet in ventriculo serum , cujus aciditas ac vis noxia motu expansa ad partem exquisitissimo sensu pollentem *respirat* dictam ob supinum infantis in cunis situm appellitur , cardialgiæque valet procreare.

I V.

INTEREST puerorum vagitus comperere : principiis obsta , causas scruteris : clamat infans ; Quid mirum ? Libero se agitare motu , ac per somnum suos artus passim dispergere exposcit ; captivo vincula exime : mox cum exoptatâ libertate pristinam recuperabit hilaritatem. Quis ita coarctari undique adultus non ingemisceret ? Quis , præsertim si graciliori fibrâ donetur , intrâ foetidam sordium cloacam computrescere molle corpus sustinebit ? Huic infantis clamorum causæ munditiæ nutrices primò occurrere possunt : sed alia urgent mala quibus facili interdum negotio opitulari penès medicum foret , si ad eum dociles statim confugiant : is meconium primis diebus diligenter expellendo , acidum lactis corrigendo , lacteæ , pultaceæ , solidioris denique diætæ tempora & modos adscribendo multa tormina , multas susteret convulsiones , &c. . . Quidquod ex parciore lacte dato sævientem famem , ex copiosiori econtrâ alimento coquendo imparem ventriculum querulis vagitibus demonstrant infantes. Superest denique nutricibus facilis sæpè vagitus compercendi modus in mirabili eâ sympathiâ quâ pueri , dum vident alios ridentes , ridere & ipsi solent ; & sic innoxie inter exultantis blandèque jocantis nutricis amplexus suorum sæpè malorum fuerint immemores.

V.

NATURALEM igitur pueri constitutionem nutrices sedulò explorent , medicorum præceptis dociles obtemperant , & mox de nocivo cunarum succutiendarum usu desciscunt. Enimverò nonne jam ad somnum ex suapte naturâ satis proni sunt infantes , quin etiam ad eum sint excitandi pravâ methodo. At , inquiet aliquis , puerum in cunis agitando nutrix naturæ leges sequitur : oscillatorios enim foetus uterinis aquis immersi motus omninò mentitur. Sed quâni à recto deviat tramite. Tantùm enim uterinæ oscillationes à cunarum agitatione

discrepant, quantum zepirus ab austro, quantum tremula placidi maris agitatio à procelloso ejusdem tumentis impetu. *Omne violentum est naturæ inimicum* : idcirco insolitis & repetitis cunarum succussionibus quasi sufflaminatur circulatio, operantur ubique stases, obstupefcunt spiritus animales, illorum acies obtunditur, ipsaque pulpofa cerebri labefactatur moles, & brevi jacens iners hebetatur infantulus. Tutiozem ergò vagitus compescendi methodum accipiant nutrices; vinculis expediant tenerum corpus: aptum tempore idoneo præbeant efurienti pabulum; caveantque versando cunas somnum conciliare cujus perniciēs plurimis confirmatur experimentis, undè concludere pronum sit:

Ergò infantūm vagitus cunarum succussionibus compescere Noxium.

Proponebat Parisiis HENRICUS-JOANNES BAGET, Parisinus, Saluberrimæ Facultatis Medicinæ Parisiensis Baccalaureus, Theses Author. A. R. S. H. 1771.

A SEXTA AD MERIDIEM.